

DOMENIE XXIII «VIE PAL AN»

Antifone di jentrade Sal 118,137.124

Tu sês just, Signôr, e al va ben ce che tu distinis;
trate il to famei seont il to boncûr.

Colete

Diu, che di te nus diven la redenzie
e nus ven dade l'adozion,
cjale di bon voli i fîs dal to boncûr,
par che ducj chei ch'a crodin in Crist
a vedin sigurade la vere libertât e l'heritât eterne.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Is 35,4-7

Lis orelis dai sorts si vierzaran, la lenghe dal mut e scriularà di gjonde.

Dal libri dal profete Isaie
Disêt ai cûrs sconsortâts:
«Coragjo! No stait a vê pôre,
ve il vuestri Diu!
Al ven cul svindic,
e je la pae di Diu,
lui al ven e us salvarà».
In chê volte si spalancaran i vôi dai vuarps,
e lis orelis dai sorts si vierzaran.
In chê volte il çuet al saltarà tant che un cerf,
e la lenghe dal mut e scriularà di gjonde,
parcè che lis aghis a spissularan tal desert
e i riui te pustote.
Il teren arsinît al deventarà un palût,
e chel sec dut fodrât di risultivis di aghe.
Peraule di Diu.

SALM RESPONSORIÂL dal Salm 145

R. Anime mê, laude il Signôr.

O ben:

R. Aleluia, aleluia, aleluia.

Il Signôr al manten la sô fedeltât par simpri.
Ur fâs justizie ai tibiâts,
ur da il pan a di chei ch'a son afamâts.
Il Signôr i presonîrs al libere. **R.**

I vôi dai vuarps il Signôr al torne a vierzi,
il Signôr al torne a tirâ sù chei ch'a son par tiere,
il Signôr i vûl ben a la int juste,
il Signôr al vuarde la int foreste. **R.**

Al viôt dal vuarfin e de vedue,
impen che lis trainis dai triscj lis savolte.
Il Signôr al regnarà par simpri:

il to Diu, Sion, di ete in ete. **R.**

SECONDE LETURE Jc 2,1-5

Diu no aial sielzût i puars di chest mont par fâju erêts dal ream?

De letare di san Jacum apuestul

Fradis miei, no stait a miscliçâ la vuestre fede tal Signôr nestri Gjesù Crist, Signôr de glorie, cun preferencis par un o par chel altri. Metìn ch'al jentri intune vuestre cunvigne un cuntun anel d'aur tal dêt, vistût di lusso, e ch'al jentri ancje un biât cuntune munture fruiade. Se vualtris si voltais viers di chel ben vistût e i disês: «Sentiti culî tal miôr puest», e i disês al biât: «Tu sta in pîts lajù» o ben: «Sentiti culî, daprûf dal gno scagn», no fasêso diferencis dentri di vualtris e no diventaiso judiçs ch'a judichin cun tristerie?

Scoltât, fradis miei cjârs: Diu no aial sielzût i puars di chest mont par fâju siôrs inte fede e erêts dal ream che ur à imprometût a di chei che i vuelin ben?

Peraule di Diu.

CJANT AL VANZELI Mc 7,37

R. Aleluia, aleluia.

Al à fat propit dut ben!

Al fâs sintî i sorts e fevelâ i muts.

R. Aleluia.

VANZELI 7,31-37

Al fâs sintî i sorts e fevelâ i muts.

Dal vanzeli seont Marc

In chê volte, Gjesù, tornât a partî dal teritori di Tîr e passant par Sidon, al rivà tal mâr di Galilee, in plen teritori de Decapoli. I puartarin un om sort e mut e lu prearin di metii lis mans sul cjâf. Alore lui, dopo di vêlu tirât in bande, lontan de fole, i metè i dêts tes orelis e, cu la salive, i tocjà la lenghe; po al alçà i vôi viers dal cîl, al suspirà e al disè: «Efatà», ch'al vûl dî: «Vierziti». E a colp lis sôs orelis si vierzerin e il grop de lenghe si disgropà, sichè al fevelave benon. Lui ur comandà di no dîjal a dinissun; ma plui lui ur al inibive e plui lôr lu publicavin; e tal colm de maravee a disevin: «Al à fat propit dut ben! Al fâs sintî i sorts e fevelâ i muts».

Peraule dal Signôr.

Su lis ufiertis

Diu, che di te e diven la vere devozion e la pàs,

danus di onorâ, cun chest regâl,

la tô maiestât in maniere conveniente

e, cu la partecipazion a chest misteri sant,

di sintîsi plui unîts fra di nô.

Par Crist nestri Signôr.

Antifone a la comunion Sal 41,2-3

Come une cerve e gole un ruiuç di aghe,

cussì la mê anime ti gole te, gno Diu:

la mê anime e à sêt di Diu, dal Diu vîf.

O ben: Zn 8,12

Jo o soi la lûs dal mont, al dîs il Signôr.

Chel ch'al ven daûr di me nol cjamine tal scûr,

ma al varà la lûs de vite.

Daspò de comunion

Diu, che tu nudrissis e tu fasis vivi i tiei fedêi
cu la tô peraule e cu la fuarce di chest sacrament dal cîl,
danus la grazie di cjapâ zovament dai tancj regâi dal to cjâr Fi
e di mertâ di spartî par simpri la sô vite.
Lui ch'al vîf e al regne tai secui dai secui.